

東
華
續
錄

東華續錄

同治五十七

臣王先謙敬編

臣張式恭恭校

五月己未朔諭軍機大臣等成祿奏官軍移紮甘郡前軍進偪肅州並連日獲勝情形各摺甘涼一帶賊壘林立經成祿派撥已革知縣寶璽等帶隊陸續由涼州前進先解永昌城圍進紮距肅州六十里之黃泥鋪已革總兵慶瑞等進紮雙井子互爲聲援將疊次撲營之賊先後擊敗追殺甚多該提督亦擬督隊由甘郡馳赴肅州前敵著成祿乘此聲威激勵諸軍迅將肅州城垣攻克毋稍遷延伊犁被圍日久危急萬分該提督於攻克肅城後卽當星夜督軍出關馳援新疆各城以解倒懸不得稍存觀望道員黎獻前已有旨令楊岳斌察看見據成祿奏稱該員被肅甘兩屬紳耆控

告有受賄緩師縱勇殃民等事情節較重著楊岳斌確切查明據實嚴參不得稍事徇隱所有黎獻前轄之南北兩營均著專歸成祿調遣卽由該提督派員管帶其黎獻所領之馬步六營卽著交署肅州鎮總兵黃祖淦代領申明紀律嚴加鈐束該提督前次奏請以降調鎮迪道文麟督辦行營糧臺文麟見已簡放哈密辦事大臣著楊岳斌趕緊另派妥員前往經理該軍營糧臺事務並飭甘涼兩屬地方官將該軍營日食麵斤草料就地設法供支源源協濟不得稍存玩視將此由六百里各諭令知之○河南巡撫李鶴年奏張牛股匪竄赴豐碭見已馳抵歸德防剿得旨張牛股匪雖竄豐碭難保不回竄豫疆著李鶴年督飭各軍認真防剿毋令乘閒紛突○官軍復廣西潯州府城○予甘肅陣亡副將王夢麟祭葬世職○壬戌諭軍機大臣等張亮基奏逆匪襲踞興義府城

並新城回匪句結貞豐賊匪襲城永甯州屬漢夷仇殺各情形暨
請留劉獄昭暫緩赴滇各摺片新城回匪金萬照等句結貞豐賊
匪襲踞興義府城將疊著戰功之馬忠慘加殘害張亮基於各屬
稟報不符之處詳加剖晰既知金萬照等之甘心從逆何以仍示
羈縻且於張定中之稟報不實狼狽爲奸者反令其暫署遊擊代
辦總兵實屬意存遷就著卽迅速查明興義失守實在情形另委
妥員往署遊擊等缺責令會同見署知府陳聘儒調齊勇練務將
興義府城趕緊收復並將貞豐等處次第戡定不得再事顛預致
賊勢益形滋蔓署知府李保衡是否殉難抑被拘囚著張亮基查
明具奏永甯州屬新寨烈山村漢民殺害教民一案主教胡縛理
稱係署知州尹樹棠無端帶練戕害而張亮基咨訪則係從教夷
民平日焚殺滋擾漢民激於公忿糾眾報復殺斃烏拉巖夷民三

人尹樹棠前往彈壓始各解散與胡縛理所稱情節迥殊張亮基
務當督飭委員秉公查明速行了結毋得遷延日久另生枝節前
據劉嶽昭奏請回川籌商軍事當經諭令俟遵綏軍務事定卽行
馳赴新任毋庸折回川省張亮基惟當與劉嶽昭會商熟計務將
綏陽一帶剋日肅清則黔省軍聲日振卽可力圖自強正不得專
恃援兵自甘頽靡將此由六百里諭令知之○癸亥予安徽陣亡
參將盧智庸等祭葬世職○總理各國事務衙門奏俄國駐京使
臣欲往黑龍江內地通商與之約定百里以內照章貿易百里以
外持照遊歷不得以遊歷執照爲通商之用奏入諭特普欽酌度
商辦○諭軍機大臣等總理各國事務衙門奏比利時國換約屆
期一摺比利時國前立條約聲明一年期內在滬互換見據該國
公使金德呈遞照會內稱請派員前往上海會辦等語該公使見

往東洋約三箇月後可以到滬應於本年九月以前互換著派郭
柏蔭將上年與比利時國所立條約妥爲互換其條約各本俟崇
厚派員齎送至江蘇時卽著郭柏蔭祇領屆期前往上海辦理並
著軍機處將此次寄諭摘錄一併發往如該使索看憑據卽可給
與閱看俟換約事畢此旨仍繳還軍機處備查總理各國事務衙
門摺一件該國公使照會一件均著鈔給閱看將此由五百里諭
知李鴻章並傳諭郭柏蔭知之○甲子諭軍機大臣等李鶴年奏
官軍勦賊獲勝一摺任賴等逆回竄夏邑胡家橋等處經馬德昭
等軍追躡將賊擊敗由歸德一帶奔竄官軍追擊先後殺斃賊黨
千餘名餘賊南遁勢趨亳州李鶴年見已飭令宋慶等軍跟蹤追
擊卽著嚴飭宋慶等視賊所向越境攻勦毋得稍分畛域賊蹤偏
近毫境防勦不可稍鬆著喬松年嚴飭程文炳認真堵剿毋令該

匪乘閒奔突張得勝太和之軍及沙渦兩河礮船並著該撫相機調遣就近援剿藉壯軍威曾國藩卽飭周盛波南路之師探蹤前進並飭劉秉璋等軍往來遊擊以收聚殲之效豫軍此次追賊雖頗有斬獲究未能大挫兇鋒姑念其忍飢力戰已明降諭旨將出力之參將蔣東才等照給獎敘嗣後遇有小勝李鶴年當將出力人員存記彙保毋許隨摺保列多人以示限制將此由五百里各諭令知之○乙丑諭軍機大臣等都興阿奏通籌奉省剿捕機宜並將南路竄匪剿除淨盡一摺李洛萬餘黨均隱伏清河溝該將軍察其形蹤不甘遣散亟應嚴密接捕著卽督飭色爾固善並續派之托倫布等各率所部協同接剿毋畱遺孽富明阿見在邊外火洛站與色爾固善面議會剿機宜其應如何添撥勁旅會同聚殲之處著都興阿咨商富明阿妥籌布置八家子新兵堡等處爲

東路要隘均須派兵駐紮扼賊紛竄之路都興阿見於五月初二
日前往興京察看各處情形卽著將杜嘎爾所帶察哈爾黑龍江
馬隊擇要駐紮妥爲調度李光明劉洛耗等逆首業經正法餘黨
殲戮殆盡南路見雖無賊而零星殘匪難保不暗中伏匿復圖瞞
聚仍著檄飭劉景芳等認真搜捕務絕根株將此由五百里諭令
知之○丙寅諭軍機大臣等吳棠奏大股捻逆撲犯清淮官軍分
路扼剿並履勘調度情形一摺張賴各逆因東皖豫各省官軍林
立意圖竄擾清淮併力以逞經吳棠督飭各軍一敗之於成子河
再敗之於運河劉秉璋等復於洋河一帶痛剿數次先後斃賊數
百名賊於五月初二日仍向泗州一帶遁去剿辦尙屬出力在事
水陸員弁暨各屬練董著准由吳棠擇尤存記彙案保獎毋許冒
濫惟此股賊匪奔突靡常難保不思回竄清淮兵力無多雖未能

越境追剿而防範不可稍鬆仍著吳棠嚴督在防將士及紳董人等力扼水陸要隘堅守圩寨以遏賊衝毋令乘隙抵瑕擾及完善其徐州等處防務仍飭李鴻裔董鳳高等嚴密防剿毋稍疏虞將此由五百里諭令知之○諭左宗棠徐宗幹奏官軍越境剿辦齋匪殲除淨盡一摺閩省崇安縣齋匪聚眾戕官經提督黃少春兜剿搜殺閩境肅清復督軍越境追至江西之上饒鉛山等縣地界連次接仗獲勝斬戮甚多並派隊窮搜山穴餘黨幾無漏網捕獲匪首陳奴奴卽陳順光等多名逆首安壽子亦經崇安紳士擒獲送官一併正法齋匪黨與盤踞封禁山內歷有年所地方文武總未能實力搜捕每至聚眾滋事見雖崇安戕官股匪殲除而餘黨潛伏山內傳習邪教藏匿尙多劉坤一見已撥席寶田一軍前赴河口駐紮左宗棠亦派張樹蓼駐軍崇安以備會剿著卽乘此聲

威飭令帶兵各員會合兩省兵力分赴封禁山內實力窮搜務將積年潛匿匪徒悉數捕戮以期一勞永逸不得以山徑險阻畏難中止草率了事致貽後患並著劉坤一選派賢能地方官編查保甲隨時曉諭該處百姓毋爲邪教所惑以靖盜源是爲至要將此由五百里各諭令知之○丁卯諭官文籌解成祿軍餉○戊辰諭軍機大臣等穆圖善奏收復靈州並省城變亂通籌西北大局情形各一摺靈州回弁馬朝清捐交銀米繳械投誠經穆圖善派令佐領豐紳等前往收復州城委知縣尹泗等代理知州參將等缺並查明該回民金積堡並無私藏器械見在漢民歸業甚眾均各安堵如常辦理尙妥卽著穆圖善楊岳斌督飭該處地方文武將撫恤難民清查地畝一切善後事宜妥速籌辦以期各安生業所陳省城標兵因餉譁變各情與楊岳斌前奏大略相同其河狄各

同撲犯省城亦經林之望奏及疊經有旨諭令楊岳斌催督曹克忠帶兵進援並據奏稱曹克忠業已啟行該督親赴鞏昌辦糧接濟卽著催令該提督徑赴蘭州撫定羣情次第將省外回氛實力掃蕩綏靖嚴疆穆圖善所稱陝甘回眾宜分別招撫楊岳斌前赴涇州時陝回於途中遞稟投誠該督不肯批准該回眾逾數萬到處剽掠以致鹽固等處逆氛徧地等語朝廷於回眾本無歧視如果真心悔罪自當予以自新惟陝回竄甘者陝省既不能相容甘省自當妥籌安插著楊岳斌劉蓉恪遵前旨悉心籌辦以期節餉休兵毋得偏執平涼各縣回民均由馬朝清代遞稟呈乞撫穆圖善擬委曹熙帶馬朝清馳赴各路相機妥辦並著該將軍總督等和衷商辦毋致勦撫兩歧將此由六百里各諭令知之○諭山東等省各督撫迅解甘肅軍餉○己巳 上詣 大高殿祈雨○辛

未諭軍機大臣等楊岳斌奏崔逆分竄陝疆分軍會擊並陳見在局勢一招逆匪崔三竄擾鳳岐經陝軍擊退旋復回竄甘境見又有回逆馬隊由華亭所屬馬峽口小道橫突而過勢復東趨該逆食匱計窮時思竄擾陝疆以圖狂逞汧隴一帶前經劉蓉派令蕭德揚等分投防守蔣凝學所部楚軍前由邠長徑趨涇州計已到防著楊岳斌劉蓉卽飭各軍聯絡聲勢探明賊蹤合力兜擊毋令闖入陝疆復行滋蔓並著楊岳斌責令譚玉龍迅速進兵將隆德縣城力圖攻拔節節掃蕩疏通糧路孫義漳馬澂甲等既有反正之意自當暫示羈縻俾免與各股逆匪勾結楊岳斌仍當妥籌防範毋稍大意平涼地方雖有沈大興數營扼紮恐兵力尙單見在靈州回弁馬化澂已經投誠東北一路漸次綏定著穆圖善仍遵前旨酌撥兵勇分紮鹽固等處與平涼官軍互相策應以免賊匪

再圖窺伺曹克忠一軍見在曾否進省楊岳斌見赴鞏昌籌運軍糧務當源源接濟俾免匱乏省城一帶羣回環伺應如何分兵防剿之處並著妥籌布置毋稍疏虞將此由六百里各諭令知之○壬申予安徽殉難參將裕昌祭葬世職○癸酉諭軍機大臣等富明阿奏查勘西路情形並將山口竄出賊股截剿獲勝仍催兵進山剿辦一摺富明阿於四月十五日由省督師馳赴西路入驛沿邊一帶查看賊情催兵前進賊匪由赫爾蘇蛟河等處竄出經富明阿派令春壽等會同阿里雅遜等奮勇進剿追入奉省之買賣街地方其斃賊三百餘名剿辦尙爲出力該將軍見在輝發河北紮營相機調度仍著督催大軍進山接剿務期淨絕根株毋畱餘孽都興阿前已督兵啟程查看各處情形卽著與富明阿會商進山剿賊之方合力夾擊俾免此孽彼竄吉林餉項不敷前經諭令

戶部指撥各省協餉未到以前由盛京庫存餉俸銀內或由上年部撥勒匪軍餉內先行酌撥十數萬兩知照吉林將軍派員領取著都興阿懷遵前旨源源撥給以資接濟俟各省銀兩解到時卽行撥還歸款另片奏派協領三隆查拏逃弁玉山等一月有餘未傳一名到案其平日因循廢弛把持公事已可概見該將軍已將三隆所轄各處差使裁撤勒限嚴拏如逾限無獲卽著從嚴參辦以儆玩泄將此由五百里各諭令知之○甲戌諭軍機大臣等圖庫爾奏營盤被陷塔城失守潰兵應紮何處請給棍噶札勒參關防廣鳳奎昌奏塔城失陷胡畢勒幹等帶兵移至烏梁海等處派員開導攔阻各摺片覽奏曷勝憤懣塔城被困日久該逆突於二月初七日糾同哈薩克撲陷官軍營盤旋於二十六日攻破城池圖庫爾有帶兵之責乃於賊匪攻撲塔城並不趕緊救援以致城

池失陷實屬咎無可辭著先行交部嚴加議處圖庫爾既聞塔城失守之信卽應商同棍噶札勒參督率官兵力圖克復乃竟帶領厄魯特等移至科屬烏梁海土爾扈特地方竟置塔城於不顧尤爲荒謬棍噶札勒參從前剿賊頗能得力業經有旨賞給呼圖克圖名號此次因病移營遂致失利尙屬可原著圖庫爾卽行商同該呼圖克圖統率厄魯特蒙古官兵迅回舊地挑選精銳規復塔城力圖自贖儻再遷延不進定將圖庫爾從重治罪決不姑寬武隆額前給棍噶札勒參關防著准該呼圖克圖執掌以資統帶圖庫爾等移營西進需用糧食軍火等項著廣鳳奎昌迅籌撥給俾利遄行塔城被困年餘明諄麟興車林敦多布廣鳳奎昌坐視鄰境之危並不設法援應以致終於淪陷亦屬有負委任著傳旨嚴行申飭見在塔城旣失難保該匪不伺隙東趨烏科兩城防守亦

關緊要著明諒廣鳳等豫籌布置嚴密防維毋稍疏懈塔爾巴哈
台參贊大臣已簡放德興阿未到任以前令李雲麟署理李雲麟
係棄瑕錄用之員尤當激發天良勉圖報稱著卽率同圖庫爾等
迅速前進規克塔城布爾和德德克吉訥均在科境並著幫同李
雲麟等前赴塔城辦理勦匪事宜不得遷延觀望致干重咎將此
由六百里各諭令知之○諭前因西路軍務緊急疊經諭令成祿
整隊出關迅速應援茲據廣鳳奎昌圖庫爾等先後奏到塔爾巴
哈台城被回匪攻陷厄魯特人眾逃至科城並風聞伊犁大城有
失守之信關外情形日益糜爛成祿奉命西征爲日已久乃因肅
城未復節節逗畱楊岳斌身任兼圻勦辦回匪是其專責並不選
派勁旅協同成祿規復肅州以致關外各城援絕被陷楊岳斌成
祿均著傳旨嚴行申飭楊岳斌計已行抵鞏昌著卽飭曹克忠馳

赴蘭州安籌布置並選派得力兵勇前赴肅州一帶勦洗催令成祿迅速出關將各路回匪次第掃蕩儻再玩延必將成祿重治其罪懷之本日有人奏楊岳斌人甚樸忠辦事認真惟風聞甘省兵變爲楊岳斌發餉不均偏袒楚勇所致等語該督身膺重寄所部營兵自當加意拊循推誠布公方可收同心禦侮之效斷不可稍存歧視致眾兵解體貽誤事機將此由六百里各諭令知之○諭前因新疆軍務緊要曾經諭令王榕吉籌辦軍火米麪由綏遠城運至烏里雅蘇台交明誼等撥給應用旋據王榕吉奏稱先後撥解馬槍一千桿烏槍五百桿並刀箭鉛丸火藥等件分起解綏又動碾清水河廳倉穀四千石就近由綏轉運赴烏茲據圖庫爾廣鳳奎昌等先後奏稱塔爾巴哈台城被回匪攻陷圖庫爾收集潰散並厄魯特蒙古七千餘人退至科布多境內該城存項無多不

敷分給兵勇及蒙古人眾日有飢斃待哺嗷嗷亟須迅籌接濟著
趙長齡卽將各省解到新疆餉銀並晉省應協之餉迅速派員解
赴綏遠城咨照該城將軍剋日設法轉運烏城由明設等撥解科
布多發給圖庫爾等以拯飢困其軍火米麪並著再行添籌若干
陸續趕解不得稍分畛域致誤要需所有購辦軍火米麪等費卽
由晉省協餉項下劃扣作正開銷新疆各城大半淪陷須由科布
多轉運糧餉以便圖庫爾等力圖恢復趙長齡務當顧全大局隨
時解濟毋稍膜視將此由五百里諭令知之○予塔爾巴哈台陣
亡參贊大臣武隆額祭葬世職如都統例諡威毅○諭廣東督撫
清查濱海各州縣沙田丈量升科○諭趙長齡迅速籌解銀兩備
新疆軍需○諭劉坤一督辦保甲查拏齋匪○追予江蘇殉難將
軍祥厚等建祠○乙亥諭軍機大臣等兆琛奏規畫貴東軍情馳

赴玉屏剿辦一摺湖南晃州至貴州鎮遠二百里閒苗寨林立藩司見擬赴玉屏分屯鎮遠先剿清江各寨然後進攻台拱之賊所籌尙妥著卽趕緊進兵實力剿辦俟清台克捷該藩司卽會同周洪印天柱之師由鎮遠一帶鼓行而西剿撫兼施自不難迎刃而解並著飭令李元度迅卽由銅仁進剿思南石阡教匪節節掃蕩期與劉嶽昭西路各軍聲息相通併力攻剿毋得逗畱觀望坐失事機荔波一帶踞匪甫於上年冬閒擊退何以縣城猝被竄陷該逆復以大股圍攻獨山州城此路若再隔絕則楚省運餉赴黔無從繞道黔省必更形危困著張亮基速派得力之師剋期援救並將荔波一城力圖收復以期疏通要路不得以餉絀兵單藉詞支飾劉嶽昭仍當恪遵前旨將黔西大定畢節各處土匪迅速掃除卽行赴滇任事以重職守將此由五百里諭知劉嶽昭張亮基並

傳諭兆琛知之○諭總理各國事務衙門奏接據榮全咨稱伊犁大城於正月二十二日失守合城官員殉難見籌恢復等語伊犁大城困守已久終以援兵不至爲賊攻破明諡等坐視鄰封之危不思設法援救實堪痛恨見在榮全文稱俄國來文俄官不日帶兵數千名同往收復並有俄兵數千名結隊陸續前來之語本日已令庫克吉泰督辦新疆北路軍務並令神機營王大臣直隸總督挑選旗綠各營精兵數千前赴科布多聽候庫克吉泰調遣惟道路遼遠庫克吉泰由廣東副都統升任西安將軍一時尙難行抵新疆明諡麟興車林敦多布廣鳳奎昌明瑤務當就見有兵力將烏科兩城防守事宜妥籌布置麟興並遵前旨將調到蒙古官兵趕緊訓練剋日統帶前赴李雲麟等軍營妥籌規復伊犁各城見在事勢已急所調蒙兵亦不拘定六千之數致滋遲誤伊犁將

軍已令榮全署理榮全未回以前卽著李雲麟暫行代辦將伊城潰散兵勇設法拊循招集重振軍威塔爾巴哈台城卽責成李雲麟圖庫爾等督同呼圖克圖棍噶札勒參統率厄魯特等蒙兵迅卽前進力圖攻拔一俟塔城收復卽行合兵進規伊犁爲次第掃蕩之舉廣鳳奎昌明瑤仍遵昨日諭旨將圖庫爾等糧食軍餉籌畫撥給毋稍歧視至各省指撥伊城餉銀已諭令戶部咨催各該督撫迅解烏里雅蘇台由明誼等酌量緩急均勻撥用毋庸再行借由俄站轉解致有他虞新疆全局糜爛非南北兩路合力進剿不足大挫兇鋒著楊岳斌懷遵昨日諭旨迅派得力兵勇前赴肅州一帶剿匪以便成祿迅速出關將各路回匪以次掃除儻成祿仍事稽延必當重治其罪鶴齡一軍本爲出關之用曹克忠抵省後卽可騰出此軍西行助剿著楊岳斌相機調派毋稍玩延將此

由六百里各諭令知之○諭昨據廣鳳等奏塔爾巴哈台失陷本日復據總理各國事務衙門奏接據榮全咨稱伊犁大城失守等語新疆回匪變亂以來幾及兩載各城困守待援前調成祿等軍出關剿賊又因甘省肅州一帶回氛未靖節節掃蕩未能剋期前進且卽出關以後尙須將哈密一帶賊匪剿除方能西進亦屬緩不濟急因思烏科兩城爲北路屏蔽見在伊塔兩城旣經失陷若不迅調勁旅前往剿辦難保該逆不駸駸東犯大局益難收拾庫克吉泰前經簡放西安將軍見在行抵何處卽派該將軍督辦新疆北路軍務取道草地由烏科兩城進發神機營兵及直隸綠營官兵素經訓練剿賊必能得力卽著神機營王大臣劉長佑商同將旗綠各營共湊調兵二三千名派員管帶由北路草地前赴科布多聽候庫克吉泰調遣所需軍火器械等件著該王大臣及該

督妥籌應付以便進行甘肅甯靈見已安定情形稍鬆著穆圖善先其所急挑選精兵一二千名遞派得力將領卽由甯夏北路取道出口馳赴科布多會齊一併歸庫克吉泰調遣不得稍有延誤穆圖善辦理招撫事宜何時可以竣事能否酌留兵勇彈壓甯靈等處降回而自率精兵與庫克吉泰會剿並著該將軍通盤籌畫奏明辦理將此由六百里各諭令知之○諭伊城業經失陷自應迅圖規復以冀挽回西陲大局關內之兵相距寫遠雖經疊催成祿等剋期出關恐其到尙需時本日復諭令烏里雅蘇台選撥蒙兵由該城大員統帶前往俄國旣肯借兵合力進取更可易於集事榮全到俄已久情形諒必熟悉所籌內外交涉事宜頗中肯綮伊犁將軍卽著榮全署理以重事權著與俄國帶兵官斟酌機宜慎籌辦理儻俄兵卽日啟行著卽趕緊會合前進迅克伊城如俄

兵一時未齊榮全亦可先回伊犁邊境接辦本任事務將潰兵散勇迅速招集以期復整軍威再圖掃蕩其中進止機宜務須審機度勢以策萬全見存喀帕兒庫內及科米等處餉銀既經榮全派員會同俄官看守自必妥協此項餉銀轉輸非易如有急需之處准由榮全酌量提用毋得稍事虛糜將此由六百里諭令知之○以榮全署伊犁將軍○廣安撤潛山縣學額七名六安舒城英山各四名霍山三名○丙子轉英元爲理藩院左侍郎以魁齡爲理藩院右侍郎由內閣學士遷○丁丑以雨澤稀少詔刑部順天府清理庶獄○己卯以郭祥瑞爲廣東按察使由督糧道遷○庚辰詔各直省招墾被兵荒地○辛巳諭軍機大臣等曾國荃奏續招新軍到鄂趕緊訓練赴防請裁後路西路各營以節餉需一摺提督郭松林道員彭毓橘所募湘勇七營見已到鄂其餘各營六月均可到齊曾

國荃擬趕緊訓練卽檄進紮隨州唐縣鎮仍著官文曾國荃和衷商榷妥協辦理協領喜昌等所帶各營旣難得力自應裁汰以節餉需惟各營人數眾多概行遣撤或恐別生事端且其中亦未必盡屬羸弱若選其精壯分別去留束以新規去其舊習未始不可收轉移之效並著官文曾國荃妥籌商辦務使兵歸實用餉不虛糜其旣遣之勇斷不可令其復來應募其滿綠各營並著一體操演未可專恃招募致成冗濫從前湘勇由各路潰回者甚多此次新招之軍亦不可令其應募官文曾國荃務飭各營嚴密稽察毋任濫充滋弊此由五百里各諭令知之○諭劉蓉奏回逆大股復竄隴州另以騎賊繞竄鳳翔請飭穆圖善等派兵會剿請將出力之鎮西軍彙案保獎各摺片逆回馬生彥孫義漳等糾集靖遠靜甯等處巨股眾約三四萬人陸續竄至隴州經劉蓉派令蕭德

揚黃鼎等迎擊屢獲勝仗該逆馬隊分股由麟遊繞至鳳翔勢頗蔓延隴州各軍被賊隔斷有內竄腹地之勢劉蓉見飭劉厚基率親兵五營折赴鳳翔並令蕭慶高率湘果三營趕赴寶雞著卽催令該二軍趕緊前進迎頭截剿隴州賊眾兵單該撫務當督飭蕭德揚等奮力堵剿毋稍大意此次賊眾傾巢犯陝計圖大逞較之各聚一隅似易殄滅惟陝省止此兵力若任其內竄又將不可收拾著穆圖善先撥金順帶領得力馬隊由定邊取道邠長馳赴鳳翔隨卽分撥步隊繼進竄甘逆回見俱棄城挈眷回竄陝境甘省情形稍鬆著楊岳斌先撥駐秦州之王得勝一軍由蓮花城趨赴隴州仍抽調勁旅親督會剿務須趁各逆曾麕聚之時合力兜剿以收聚殲之效劉蓉另片奏甘回董福祥等竄踞安化屬之棗子扁等處同知耶太愚等越境會剿屢次獲捷鎮西軍疊次冒險遠

征勞績尤著所有尤爲出力員弁著劉蓉彙案覈實保獎毋許冒濫將此由六百里各諭令知之○諭圖庫爾等奏前往科布多調兵一摺塔爾巴哈台失陷亟應派兵進剿見在呼圖克圖棍噶札勒參阿隆阿前赴科布多請兵援救以圖恢復該呼圖克圖志切同仇殊堪嘉尚卽著廣鳳奎昌明瑤趕緊調撥兵弁交李雲麟督同棍噶札勒參等剋日進剿毋稍遷延所需糧食軍火等項著廣鳳等懷遵疊次諭旨迅籌撥給塔城被難逃出之七千餘眾廣鳳等務當妥爲安置毋令失所滋事圖庫爾本有應得之咎若不亟圖補救奮勉立功其罪更不可追卽著統兵前進毋許徒託空言李雲麟代辦伊犁將軍事務又任參贊尤當督率圖庫爾等迅速進兵將塔城相機恢復方爲不負委任前諭明諒等調撥蒙兵交麟興統帶規復伊塔各城見在是否調撥殊深廑念明諒車林敦

多布務當迅籌挑選不許任意遲延麟興於蒙兵訓練成軍後剋日統率赴李雲麟軍營會商辦理阿隆阿布爾和德均著隨同李雲麟圖庫爾進剿不准遷延觀望致誤事機將此由六百里各諭令知之○予甘肅陣亡參將蕭玉田等祭葬世職○命撥四川山西湖北司庫銀各五萬兩備陝西軍需○壬午 上詣 大高殿祈雨○詔求直言○諭禁刑部凌虐罪囚○癸未諭軍機大臣等戶部奏遵查新疆伊犁餉銀請旨飭催並籌撥庫克吉泰軍餉一摺新疆軍務緊要經戶部先後奏撥新疆經費軍餉二百十一萬兩專撥伊犁軍餉五十六萬兩疊經諭旨嚴催各該督撫仍未能源源接濟統計已解者五十九萬六千兩未解者一百五十一萬四千兩見在伊犁塔爾巴哈台等城均因餉需不繼相率淪陷已令李雲麟圖庫爾等收集潰散重整軍旅力圖恢復並特派西安

將軍庫克吉泰帶領旗綠各營相機進剿需餉甚鉅儻各該省仍前玩誤必致新疆全局淪胥莫能收拾著劉長佑崇實駱秉章聞敬銘趙長齡李鶴年各將未解新疆伊犁餉銀迅卽籌款撥解除山西餉銀自行解交綏遠城轉解烏里雅蘇台外其直隸山東河南應解銀兩卽著解交山西由山西巡撫遞解烏城聽候撥用至四川應解銀兩並著按月解交陝甘總督酌量分撥均不准藉詞推延自干咎戾庫克吉泰督辦新疆北路軍務餉需尤應急爲籌備著照戶部所議酌撥山西地丁銀六萬兩河南地丁銀二萬兩山東地丁銀二萬兩以濟要需卽著趙長齡聞敬銘李鶴年如數籌撥遞解烏城聽候庫克吉泰提用毋稍延宕將此由六百里各諭令知之○曾國藩奏張總愚牛洛紅一股在曹縣擊敗四月二十日竄至豐縣次日竄入沛縣二十三日至徐州城西十餘里據

兵董鳳高李祥和各以兩營分路出隊擒獲數十名該逆旋即退去是夜李祥和派兵潛劫賊營薄有斬擒二十五六等日該逆竄至銅山之雙溝楊家窪一帶二十八日竄至宿遷之埠子鎮洋河集徑撲運河二十九日逼近桃源三十日江蘇臬司劉秉璋督軍馳至洋河集探知賊之大股在圩外五六里紮住馬步萬餘人四出焚掠劉秉璋派總兵吳占魁吳長慶況文榜等各帶五成隊伍乘夜徑擣賊巢擒斬近七十名五月初一日黎明收隊隨卽傳令各營整隊出擊該逆且戰且走吳長慶況文榜等由舊河隄內外分路夾擊迫至倉家集賊陣大亂斃賊甚多初三日該逆由睢甯之歸仁集回竄適劉松山一軍由徐州追賊而來行抵離城十八里之王家林卽見賊馬逼近劉松山一面督飭各營趕築營壘一面派隊迎敵部署甫定賊馬千餘向前衝突各營槍礮齊發力戰

良久賊始敗去計斃賊近三百名兵勇陣亡者四名受傷者二十餘名初四五等日該逆晝夜攻撲阜河及利運馬家渡一帶均經水師鄧長里等擊退由是不復圖犯運東乃由利國驛回竄銅山初八日劉松山進至銅山之苑山圩據報賊之後隊相距僅八九里卽整隊前進行至魏家莊猝與賊遇劉松山以四成隊固守輜重以六成隊分三路迎擊斃賊數十名該逆不肯戀戰向西南竄走各營乘勢猛追沿途又斃賊百餘名將賊隊截爲兩段一向西北荆山橋李家瓦房而去一向西南楊家集而去其賊之前股已於初七日竄近徐州賴汶洸等大股自四月十三日窺撲泗州城後旋竄宿州二十三日竄至永城縣東胡莊寨正在圍攻之際周盛波馬隊一營先到突衝賊隊擒斬數十名賊眾潰退該營卽在胡莊寨駐紮與步軍相離尙十餘里二十四日周盛波率軍前

進行甫數里該逆分三路來撲以馬隊猛撲中路周盛波督令唐邦傑等挑列隊伍併力禦之洋槍炸礮迎頭轟擊該逆抵死不退當派都司周行發率領馬隊由城西鈔入賊後賊始驚潰其前路步賊經周壽昌等擊敗後路步賊亦經周盛傳等擊敗計斃賊近二百名二十六日該逆竄往歸德二十八及三十日又折回永城夏邑之交五月初八日二鼓周盛傳出隊掩殺小有俘獲初三日賊由蕭縣之西竄入銅山初八日擾及東賀村將與荆山橋張逆之股相合適原駐徐城之張詩日李祥和等營出隊至土山寺周盛波追軍復至遂會商進擊又擒斬百餘名初八以後張牛一股由豐縣碭山竄至虞城以西任賴一股由靠山至宿州竄入懷遠渡渦河而南盤踞下蔡等處臣查該逆自二月北竄以來力圖渡運前在山東鄆城一帶搶渡後在江南宿遷一帶搶渡徘徊曹徐

淮泗者兩月有餘迄不得逞見在張逆入豫任逆入皖臣已檄飭
潘鼎新會同周盛波爲一路劉松山會同張詩日等爲一路專剿
張牛一股劉秉璋會同楊鼎勳爲一路專剿任賴一股無論該逆
竄往何處與之縱橫馳逐未知能否有濟至劉銘傳一軍改調徐
州駐紮休息騰出劉秉璋全部概作游兵李昭慶一軍以八營赴
防韓莊以十營赴防濟甯駐紮休息騰出楊鼎勳潘鼎新兩軍概
作游兵潘鼎新已於十五日拔隊啟程前赴歸德矣又奏臣前次
察看黃運兩河至張秋一帶與直隸督臣劉長佑山東撫臣閻敬
銘會商防務以直東兩省防兵互相攙雜心志不齊不如畫分汛
地各有專責議定自范縣豆腐店以上如東明長垣等處統歸劉
長佑派兵設防自豆腐店以下如張秋東阿等處統歸閻敬銘派
兵設防自運河北路隄牆見經間敬銘督飭修築甚爲堅實其南

路隄牆前因賊擾桃宿尙未認真興辦臣擬日內至宿遷桃源等

處會同吳棠查閱一次飭令各文武加工修築以期保全運東完

善上諭李鶴年奏捻匪回竄豫疆被剿遁向曹考追截情形一

摺張牛股匪由蕭碭竄至虞城邊境經宋慶等軍疊擊獲勝該逆

潛向西北奔竄有趨曹考之勢意在避兵就食李鶴年見已檄令

開陳許汝各地方官督率兵勇紳團堅壁清野著卽飭令實力奉

行務使賊縱所至無糧可擄以期日就解散黃河一帶礮船尤須

勤加巡防以杜賊匪偷渡仍飭宋慶等軍跟蹤緊追毋任該逆喘

息至曹考一帶與直隸山東地界毗連大名及濮范張秋等處黃

河防務關繫緊要劉長佑閻敬銘當嚴督在防將士加意堵禦不

可稍形鬆懈余承恩已帶所部赴豫劉長佑所籌填紮一軍共有

若干著卽迅飭到防至賊蹤飄忽靡常往往此剿彼竄非合數省

兵力四面兜剿不足制其奔突著曾國藩劉長佑閻敬銘李鶴年各飭所部將士聯絡聲勢前截後追務令賊蹤所向到處有兵堵剿不可稍分畛域致誤事機正在寄諭聞據曾國藩馳奏彙陳各軍追剿情形並直東防軍分段設守見在張牛一股竄至虞城以西任賴一股由桃宿竄入懷遠南渡渦河盤踞下蔡等處著卽分飭各該營將領視賊所向分路窮追務期殄滅淨盡並著喬松年督率皖軍會合劉秉璋等將任賴股匪就地殲除毋任他竄鮑超一軍見在行抵何處並著曾國藩酌度情形催令由信陽一帶迅赴豫境迎頭截擊以杜紛竄所奏劉銘傳一軍改調徐州李昭慶各營分防韓莊濟甯暫資休息並潘鼎新楊鼎勳兩軍概作遊兵等情均著照所籌辦理直東兩省防兵互相攙雜心志不齊曾國藩見經議定自范縣豆腐店以上並東明長垣等處統歸劉長佑

派兵設防自豆腐店以下並張秋東河等處統歸閭敬銘派兵設防著卽迅飭直東防兵各歸汛地以專責成曾國藩見擬前赴宿遷等處查閱南路隄牆並著會同吳棠督飭地方文武加工修築以期保全完善將此由六百里各諭令知之○丙戌諭軍機大臣等楊岳斌奏營官倡亂率眾東潰請分別嚴辦並王仁和等軍接仗李助發敗挫情形覽奏曷勝焦急提督譚玉龍收領餉銀二萬九千兩僅發給各營一萬一千兩其餘銀數概行剋扣入己以致眾論沸騰又復縱令勇丁擄殺良民經楊岳斌派令王得勝接統其眾譚玉龍輒以奸詭之言聳動眾聽倡議向西安潰走總兵陳義挺身倡亂參將焦萬海等同聲附和譚玉龍遂乘夜率領各營一併潰走雷正綰所部人數無多涇防各軍兵力未厚勢難阻遏此時恐已竄入陝境隴州鳳翔一帶本有回匪竄擾防剿當更喫

重劉蓉務當督率兵勇嚴密堵截毋任紛竄各處蔓延爲患陝省防兵本形單薄此時亟須添兵助剿前經諭令穆圖善調派金順馬隊並撥得力步隊馳赴鳳翔一帶應援著該將軍懍遵前旨迅卽分撥馳往並於撥發金順等馬隊各軍外添撥數營馳援陝省以厚兵力不得推諉延誤慶陽張在山所部尙有十餘營能否酌撥數營赴陝著楊岳斌劉蓉酌量情形調撥涇防各營將士仍著劉蓉就近調度應如何阻截追剿與陝軍夾擊援應之處均由該撫相機辦理譚玉龍於所屬營官各給銀百兩將弁雖爲所惑而勇丁則因其剋扣餉銀積憤甚深未必盡甘心反叛劉蓉當分遣明幹委員馳赴各潰勇營中剴切曉諭令其繳械解散各歸原籍一面將附逆死黨分別剿辦至譚玉龍等業已煽眾潰變且有至西安另圖大事之語豈肯聽劉蓉傳訊余炳忠焦萬海係懲令譚

王龍謀反之人亦豈能僅以發遣了事記名提督譚玉龍總兵陳義參將焦萬海均著卽行革職並已革參將余炳忠均著劉蓉設法擒獲就地正法秦州爲糧運要路楊岳斌務須飭令在防將士嚴密防守不可再有疏虞致斷省垣生路見在蘭州情形究竟如何該督並未奏及東路情形又復決裂如此實屬漫無布置若再不力圖補救挽回全局自問當得何罪總兵王仁和一軍護糧赴省於鎮羌等處疊次接仗雖弁兵頗有傷亡而糧石尙無疏失著楊岳斌飭令該總兵會同涼州鎮派援各營合力堵擊暢通糧道不得稍有疏虞李助發督勦張家堡一帶賊營業經獲勝乃於收隊之後突被另股賊匪橫衝該營官等不察號令臨陣慌亂以致李助發受傷兵勇傷亡不少實堪痛恨所有營官李春海陳正榮卽著楊岳斌嚴行參辦以肅軍令都司雲從龍著卽行革職暫准

留營效力以贖前愆曹克忠見由馬營前赴蘭省卽著楊岳斌嚴飭該提督迅將省城收復曹克忠到省後鶴齡一軍卽可飭令西行會合成祿所部星速出關毋令延緩將此由六百里各密諭知之○論閭敬銘籌解吳棠軍餉○丁亥諭軍機大臣等富明阿奏搜剿山內股匪獲勝及詳查圍場流民情形一摺吉林馬賊餘黨回竄山內經烏里布等帶兵搜剿擒斬數百名餘賊逃向香鑪碗子三道花園等處深山潛匿勢雖窮蹙惟匪類尙多難保不復圖勾結伺隙出竄著富明阿督飭烏里布等確探賊蹤認真搜捕以清餘孽至山內挖金流民人數不少從前地方官既不加察任其居住該流民等藉以謀食日久亦尙相安據奏擬先除賊匪緩爲設法禁止糧米入山勢窮自必渙散等語流民數千一經絕其生計豈肯束手待斃勢必流而爲匪富明阿務當察度情形妥籌安

置之法毋貽後患將此諭令知之○諭張亮基奏川軍剿辦遵義
號匪情形請畱劉嶽昭專辦黔中軍事並收復荔波縣城飭李元
度等赴黔催解湖南欠餉暫畱趙德昌在黔各摺片荔波爲省城
往來通衢必須派撥得力兵勇駐守張亮基務當妥籌布置不可
稍涉大意黔省餉絀兵單防剿不敷分布並著兆琛恪遵前旨會
同周洪印天柱之師由鎮遠等處迅速進兵仍嚴飭李元度一軍
由銅仁進取期與黔省各營聲息相通併力會剿應需餉銀卽著
李瀚章於欠解黔餉內源源撥解劉嶽昭於克復綏陽後曾經諭
令該撫由黔西一帶節節掃蕩疏通道路直抵滇省該撫何以不
候諭旨輒行回至川省殊屬羸率不曉事體見既帶兵回川若再
令回黔不免徒勞往返劉嶽昭當懷遵疊次諭旨迅卽統率所部
赴滇任事毋得在川逗畱致負委任黔省軍務張亮基責無旁貸

卽著妥籌辦理不准稍涉推諉趙德昌前經張亮基奏請飭令赴川聽候崇賢駱秉章差委並令趙德光暫署貴州提督當照所請降旨施行茲據張亮基奏稱趙德光因帶兵剿賊未能兼辦提督事務並以紳士楊先棻等向該撫懇留趙德昌遂請將該總兵留辦平遠軍務實屬毫無主見自相矛盾張亮基著傳旨嚴行申飭趙德昌前此帶兵時久經署理提督何以趙德光卽不能兼顧所有貴州提督印務仍著飭令趙德光接署毋得任意違誤並著崇賢駱秉章迅飭周達武趕緊赴黔接篆以重職守趙德昌已據崇賢等奏請毋庸赴川著卽暫准張亮基所請留於平遠等處剿辦苗教各匪如再不知奮勉卽著張亮基據實參奏毋稍瞻徇將此由六百里諭知崇賢駱秉章李瀚章劉嶽昭張亮基並傳諭兆琛知之○官軍復貴州荔波縣城飭兆琛等由鎮遠銅仁兩路進兵

與黔軍併力會剿○四川教匪劉儀順等謀逆命川黔湖廣督撫嚴緝○予貴州陣亡遊擊齊開勝等祭葬世職並知府彭培元祭葬世職建祠知州吳江等附祀○是月豁免廣東嘉應等五州縣被擾積欠錢糧浙江嘉善縣丈缺田畝攤徵銀米緩徵山西解州等四州縣上年歉收民借倉穀

六月戊子朔命趙長齡撥解涼州莊浪滿營軍餉○廣廣西鄉試中額二名懷集縣學額六名全州五名藤峇平南各四名賓灌陽北流宜山思恩貴天保各三名鬱林河池東蘭興業融各二名橫歸順平樂恭城博白柳城天河桂平各一名江蘇通州五名○己丑諭軍機大臣等前因回匪肆擾新疆各城勢甚猖獗當經調派神機營及直隸省官兵前往進剿旋以捻患未除京畿防務緊要降旨將神機營馬步各兵暫緩調撥並諭令神機營另行籌調茲

據遵旨籌議具奏卽著富明阿調吉林馬隊五百名交副都統全福管帶特普欽調黑龍江馬隊五百名派副都統安住管帶廉至調察哈爾兵五百名交參領達爾濟管帶劉長佑調直隸兵一千名揀員管帶均取道張家口前往科布多相機進剿以上兵二千五百名均交督辦新疆北路軍務庫克吉泰統帶並派德興阿幫辦軍務庫克吉泰未到以前著德興阿迅速馳往科布多先行統帶前項官兵用資鈴束所請飭調錫林郭勒烏蘭察布伊克昭等盟及喀爾喀諸部落蒙古兵一千名著德勒克多爾濟廉至迅速簡調此外尙有何部落之兵可以調派並如何嚴密布置妥爲分防之處並著車林敦多布會同德勒克多爾濟悉心籌畫奏明辦理所調各兵一併歸庫克吉泰等節制調遣直隸兵如尙可添調著劉長佑於一千名之外再行酌量添調張家口外一帶爲北路

屏蔽亦關緊要著察哈爾都統副都統除此次調撥兵五百名外另簡精兵若干認真教練操演並察看扼要處所趕緊設防以期有備無患將此由六百里各諭令知之○申禁各直省積壓京控案件○庚寅雨 上詣 大高殿報謝○諭軍機大臣等伯彥訥謨祜等奏察看地方情形會商應辦事件酌擬八條開單呈覽一摺所擬編查保甲嚴禁賭博裁撤團會收繳軍械及修築堡寨定期會哨添設員弁設立學校各節果能實力奉行可以清盜源而安邊圉卽著都興阿額勒和布恩錫將奉天應辦善後各事宜按照所擬條目事事認真籌辦總期杜漸防微力求整頓不得有名無實吉林地方卽著富明阿於搜捕事竣一體仿照辦理務令邊隅靜謐永息亂萌以副委任其兩省會哨事宜並著都興阿富明阿等會商妥辦毋得視爲具文都興阿奏邊內賊匪肅清暫行回

省一摺出邊要路新兵堡等處已有劉景芳等軍分紮堵緝都興阿自可回省辦事惟三道花園柳灌巷地方既據富明阿咨稱尙有賊股待時蠢動等語雖姜洛道業經拏獲正法難保餘匪不思竄匿仍著都興阿勤加偵探會商富明阿實力搜捕盡絕根株毋畱餘孽將此由五百里各諭令知之○諭左宗棠奏見擬試造輪船並陳勦捻利用車戰各摺片中國自強之道全在振奮精神破除耳目近習講求利用實際該督見擬於閩省擇地設廠購買機器募雇洋匠試造火輪船隻實係當今應辦急務所需經費卽著在閩海關稅內酌量提用至海關結款雖完而庫儲支絀仍須將此項扣款按年解赴部庫閩省不得輒行畱用如有不敷准由該督提取本省釐稅應用左宗棠務當揀派妥員認真講求必盡悉洋人製造駕駛之法方不至虛糜帑項所陳各條均著照議辦理

至所陳剿擒宜用車戰等語擒蹤剿疾異常飄忽靡定日前鮑超
曾有擬用獨輪車放礮之奏能否合用制勝尙未據該提督續陳
行軍之道全在因地制宜將來仍須諭令曾國藩斟酌辦理所論
調派習戰營官令赴豫秦一帶挑選士著散丁練成隊伍赴甘聽
用之處事屬可行卽著該督遴選得力營員奏明調派將此由五
百里諭令知之○允御史夏獻馨奏嚴禁各直省胥役舞弊○予
浙江陣亡遊擊吳德華等祭葬世職○予奉天陣亡同知海盛建
祠○辛卯諭軍機大臣等人奏咸豐十年閒僧格林沁督師海
口傳設暗樁間有震豫恆鹽商張兆乾等使其夥沙洛玉卽沙三
禿子潛與敵通將所設暗樁機宜洩漏致大沽礮臺被陷我軍失
利見聞沙洛玉卽沙三禿子或在豐潤縣宣莊或在北塘各鹽店
藏匿請飭查拏等語沙三禿子暗通消息以致官軍失事殊堪髮

指亟應嚴行懲辦著劉長佑不動聲色遴派幹員嚴行查拏該匪行蹤詭祕難保不潛匿近畿一帶並著萬青藜卞寶第飭屬一體嚴拏務獲盡法懲治毋任漏網原片均著鈔給閱看將此各諭令知之○壬辰諭內外大臣勤慎供職○甲午諭軍機大臣等總理各國事務衙門奏請飭催遣員田興恕赴戍等語已革提督田興恕前經崇實等委員於上年十月閒押解自涪州啟程取道川北解至陝西交替轉解甘肅迄今已逾半載該革員行抵何處何以未據續報見據法國繙譯赴總理各國事務衙門言及訪聞田興恕仍在川省逗畱與官員來往如常等語果如所稱是該地方官有意任其逗畱視屢次嚴催諭旨竟如弁髦情殊可惡著崇實駱秉章查明田興恕若尙在川省卽由該將軍等速派幹員押解出境若已出川卽由楊岳斌劉蓉查明行抵何處派員轉解甘肅邊

境守候西路稍通押令赴戍安置該將軍等接奉此旨著卽迅速查明一面勒限起解一面據實馳奏不得再事遷延自干咎戾將此由五百里各諭令知之尋崇實等奏田興恕見已解出川境劉蓉奏陝甘大路梗塞田興恕由川到陝當取道秦州押赴戍所報聞○湖南巡撫李瀚章奏仍飭總兵周洪印會合兆琛李元度兩軍速圖進攻先清貴東毋得徒託空言遷延觀望荔波已有粵軍等剋期進取廓清貴東毋得徒託空言遷延觀望荔波已有粵軍往援周洪印所部自可毋庸抽調○乙未飭山西迅解甯夏滿營軍餉○丙申諭軍機大臣等李鶴年奏匪蹤折竄西南移營許州督剿一摺張總愚股匪因被官軍追躡由甯陵等處南竄陳州周家口牛落紅一股亦由亳州竄往與張逆合股均向上蔡一帶奔竄賊蹤麇集一隅正可厚集兵力一鼓殲除曾國藩所派之潘鼎

新劉松山張詩日等軍已抵陳州卽著飭令該員等併力追剿毋令互相觀望致該匪肆行奔突擾及鄂境李鶴年見已移營許州著就近督飭馬德昭宋慶等軍跟蹤追躡與潘鼎新等軍併力兜剿不得以尾斬數賊敷衍塞責河洛空虛亟宜豫籌堵截南陽郡縣作何布置並著李鶴年相機調派毋稍大意鮑超一軍前據曾國荃奏報由麻城取道商城以達光固見在賊匪已由上蔡一帶奔竄鮑超由光固進兵正可確探賊蹤迎頭截擊著官文曾國荃嚴飭該提督迅赴戎機毋得任意遷延自干咎戾前據御史佛爾國春奏記名提督何紹彩前在皖省軍營勦辦髮捻頗能得力該員見回湖南本籍請飭赴軍營等語著官文行知李瀚章查明該員見在何處飭令前赴曾國藩軍營聽候差遣又據左宗棠奏剿捻之法利用車戰等語日前鮑超曾有擬用獨輪車放礮之奏與

左宗棠所見略同軍事因地制宜左宗棠所奏能否合用制勝著
曾國藩揆度情形酌量辦理原片著鈔給曾國藩閱看將此由六
百里各諭令知之○丁酉諭軍機大臣等劉長佑奏遵調官兵赴
科布多並懇陳辦理情形一摺據稱直隸綠營官兵前經調赴甘
省花馬池近因南路防務未撤大名各鎮未能徵調惟提標及宣
化鎮官兵尚可調撥第皆係步隊萬餘里草地並無車馬供應整
隊前進抵防之後恐成疲敝之師各等語所陳亦係實在情形惟
科布多爲北路屏蔽見在陝省軍務未竣而山西防務亦尙未稍
鬆別無可調之兵可以進援劉長佑擬調提標及宣化鎮標官兵
前往卽著飭令挑選精壯兵丁剋日馳赴張家口聽候庫克吉泰
調遣毋得稍存推諉前調赴甘省花馬池之兵既有逃亡卽應募
補豈可任其曠缺並著劉長佑迅速飭令募補足額認真訓練以

資防剿而固畿疆將此由五百里諭令知之○諭穆圖善奏遵籌
見在軍情並鹽固回眾求撫一摺甘肅省城兵變以來迄今已逾
數月曹克忠一軍馳紮鞏昌馬營監尚未前進楊岳斌於峽口被
回逆崔三攻撲折回華亭是省城竟無一枝援兵危急曷堪設想
該督遷延省外不敢進師不知是何意見見在譚玉龍一軍變而
東潰是所謂先清東路之說已成畫餅若再不將省城根本重地
力圖保全儻有疏虞致爲逆回占踞該督豈得諉過於人以爲事
不干己耶前屢據林之望奏報河秋回匪攻撲省城勢甚危急是
穆圖善所稱叛兵勾結河秋回匪之說恐亦係意料之詞該處急
盼曹克忠等軍赴援若竟置之不理又復絕乏糧食飢變之卒不
至勾結回匪踞城不止著楊岳斌迅卽催令曹克忠督兵前進將
省外逆回掃蕩入城將叛兵妥爲撫定曉以禍福毋令疑懼擒斬

首惡數人以圖補救該督亦卽整隊繼進爲曹克忠後路聲援毋得跋前疐後偏執成見貽誤地方致干罪戾甯靈見在安謐而穆圖善所部尙稱完整屢經有旨諭令該將軍撥兵前赴鹽固勦辦楊岳斌此次又咨令由中衛進兵會攻河狄以固省城該將軍輒藉口餉需反欲於夏禾收後始令周文翔曹熙等赴鹽固辦撫又屢次奏報均云俟探明何路喫重再由何路進勦試問甘省軍情此時尙有何路不喫重耶該將軍身膺督辦豈得株守一隅日以空言敷衍穆圖善此奏未免沾染軍營觀望遷延氣習殊屬非是見在鹽固回眾旣擬投誠著該將軍一面派員辦理一面分兵由中衛進勦與楊岳斌曹克忠之軍互爲聲援將省外逆回早日廓清毋再延誤干咎譚玉龍東竄後疊諭穆圖善派金順馬步數營馳援鳳翔曾否調撥著該將軍迅卽馳奏省城情形及見辦情形

若何久未據楊岳斌奏報並著該督迅速奏聞以慰廛繫本日復據訥爾濟等奏巴里坤等城待援孔亟成祿屢經催令出關曾否拔隊啟行著該督咨催該提督迅赴戎機毋得畏葸不前致干嚴譴將此由六百里各諭令知之○諭訥爾濟等奏巴里坤東路賊匪撲城疊經官兵擊退哈密回子句結南路纏頭來攻巴城請飭撥科城存銀各摺片哈密賊匪竄至三鄉湖攻撲巴城經官兵擊退該逆盤踞高家湖擄掠東路邨莊直撲滿城又經訥爾濟等督兵苦戰逆匪敗遁由奎蘇地方東竄該逆雖經官軍擊退難保不復肆詭謀訥爾濟何瑄仍當就見有兵力妥爲布置不可稍涉大意此次剿匪出力之官兵民勇准訥爾濟等擇尤保奏哈密回子蘇布爾格句結南路一帶纏頭約馬賊四五百人來攻巴城郡王伯錫爾投遞公文內稱日盼大兵出關訥爾濟將該郡王原文咨

送軍機處此時尙未接到仍著訥爾濟等將該處賊情隨時偵探一面咨照該郡王將南路纏頭設法防範妥爲彈壓巴城糧餉十分缺乏訥爾濟咨商廣鳳等將科城備撥銀一萬兩採辦口糧以濟兵食廣鳳執意不肯坐視鄰封飢困殊屬不知緩急著廣鳳奎昌明瑤將備撥古城軍營銀一萬兩趕緊發交訥爾濟等委員會同科布多委員採買糧石運解巴城毋得稍誤將此由六百里諭知廣鳳奎昌明瑤訥爾濟並傳諭何珪知之○安徽巡撫喬松年奏賊蹤被剿西竄見籌防剿得旨昨據李鶴年奏稱張牛各逆見已全股由西華竄赴上蔡一帶逆蹤飄忽或由光固窺伺皖境亦未可定喬松年當督飭各軍扼要堵截並嚴飭史念祖等出境追剿毋許觀望遲誤○戊戌諭內閣前據駱秉章奏四川雷波廳屬土司楊石金在橫江汛等處勦賊出力業經降旨賞換花翎茲據

崇實奏該土司所轄地面甚廣約束番眾甚關緊要僅有土千總虛銜恐不足以資彈壓懇請賞還原職等語楊石金著准其賞還千萬貫正長官司原職並頒發印信號紙以示鼓勵○己亥諭軍機大臣等前據楊岳斌奏譚玉龍等率眾東潰當經密諭楊岳斌劉蓉等調撥各軍追剿阻截並令劉蓉將倡亂各統將擒獲正法茲據劉蓉奏隴州保安各軍擊敗回匪並譚玉龍深自引咎見辦招撫潰勇情形覽奏均悉回逆大股東竄隴州經蕭德揚等軍分路攻擊疊獲大勝斬戮甚多踏毀賊巢數十處逆勢大蹙正可乘機剿洗該逆見退踞隴州西北故關一帶卽著楊岳斌迅飭王得勝統率所部由馬鹿鎮馳往隴州杜截逆匪回竄之路與陝軍會合夾擊以收聚殲之效保安一帶回匪蓄意東竄鄂太愚段登雲等均能用計設伏屢次截擊獲勝著劉蓉飭令該統將等隨時扼

要嚴防不可稍形疏懈尤須截其竄往隴州之路毋任與馬生彥等股匪勾結蔓延至東竄潰散勇丁已據雷正綰將陳義開定邦七營收畱其餘五六營行至涇州駐紮尙未滋事若操之太蹙恐不免激成事端然一味姑容則相率效尤日後益難聽約束此次各營譁潰實由譚玉龍等蓄謀煽惑眾心所致自當設法將爲首倡議之人拏獲懲辦其餘被脅勇丁姑免深究譚玉龍曾有前赴西安共圖大事之語此時又欲赴陝西勦賊立功自贖恐非出於至誠劉蓉仍當遵照前旨斟酌辦理不可墮其術中致貽後患陳義係首先倡議潰散之人所部勇丁既經雷正綰招收陳義應如何設法懲辦之處著楊岳斌就近咨會雷正綰相機妥辦總兵陳德隆八營由邢乾赴隴助剿並著劉蓉妥爲調遣迅掃回氛將此由六百里各諭令知之○庚子諭軍機大臣等李鶴年奏官軍追

賊上蔡縣東南大獲勝仗一摺張牛股匪疾趨上蔡而其邊騎分擾臨鄆西遂等處屢經官軍擊敗宋慶將張逆追至邵鎮迤南地方斬擒甚多馬德昭追剿牛逆一股亦頗有斬獲餘匪向汝陽一帶竄去著李鶴年卽飭馬德昭宋慶等乘此聲威力圖剿洗毋任紛竄所有此次出力員弁擇尤存記准其彙案請獎賊匪屢次敗挫而勢未稍衰必須將其著名頭目設法擒斬方可以次殄滅見在著名巨憝不過張賴任牛等逆前據喬松年奏周盛波一軍大破牛逆於義門集牛落紅僅以身免當時若設計兜擒何至死灰復然周盛波等遊擊之軍曾否入豫著曾國藩飛飭該提督等會合豫軍乘勝痛剿盡殲醜類鮑超一軍計應由楚赴豫官文曾國荃惟當懷遵疊次諭旨就近催令該提督確探賊蹤迅速迎擊毋任遷延遲誤曾國荃派赴應山之軍能否令其入豫爲鮑超後路

聲援並續募勇丁已否操練成軍均著酌度情形妥爲調度將此
由六百里各諭令知之○辛丑諭內閣向來各省提鎮等官凡經
簡放實缺者皆應陳請來京陛見近因軍興以來各省實缺提鎮
或在軍營帶隊效力前驅或因本省辦防堵剿喫緊故於該員奏
請陛見時每令其毋庸來京原以重軍事而專責成期於早殄逆
氛不至因入都往返之煩致剿賊或延時日然近來由軍營保舉
洊升提鎮各員往往有簡放實缺多年而從未經陛見甚且習以
爲常竟有不復陳請入覲者提鎮係專閫大員爲通省各營表率
其操防之能否方略之短長朝廷尙未周知何以備干城而明黜
陟嗣後軍務稍鬆及無軍務各省所有實缺提督總兵大員均著
奏請來京陛見候旨遵行至各路軍營打仗出力由兵勇保至記
名提鎮者如見未在營帶隊及業經凱撤回籍各員並著各路原

保統兵大臣督撫出具切實考語分起送部引見其副將以下等官由該部照例辦理以副朝廷慎重營伍至意○諭軍機大臣等成祿奏官兵合圍肅州並疊獲勝仗及請飭楊岳斌迅解馬匹礮位黎獻一軍交黃祖淦管帶各摺片肅州匪眾經官兵於二月間擊敗後該逆退走入城復經慶瑞等三面圍逼疊次獲勝四月初六等日逆眾率黨撲犯又經官軍擊敗該逆閉關不敢復出成祿派守備吳定山赴關外安敦玉一帶招勇以防竄逸辦理尙屬妥協賊勢旣已窮蹙自可剋期攻拔著成祿迅飭慶瑞等將肅州城力圖克復以期節節掃蕩鼓行出關以副委任黎獻一軍所存無幾而橫悍擾民不可不急加鈐束前有旨令歸黃祖淦管帶以資攻剿卽著楊岳斌速飭遵行涼屬賊氛甚熾署總兵楊占鼐因兵單餉絀未能悉布而道途梗阻餉源匱竭肅州一軍前有強敵後

無接應殊堪虞繫並著楊岳斌懷遵前旨趕緊回省以固根本而資兼顧成祿需用馬匹礮位最關緊要著楊岳斌挑選精壯馬三百匹大小礮位二十尊解赴肅州軍營以資應用將此由六百里各諭令知之○諭崇實等奏會籌進兵機宜一摺劉嶽昭簡授雲南巡撫後時遵義軍務方殷迺不候諭旨率行回川前已有旨飭令徑由川省馳赴滇南此旨尙未接到該撫又由川省馳赴貴州封疆大吏舉動未可輕率即使川黔連界有交涉事件該撫不妨與崇實駱秉章函商辦理何必親身赴川徒勞往返該撫見已馳赴遵義卽著遵照四月十五日所奉諭旨將黔西大定畢節一帶土匪剋日殲除疏通道路迅赴新任以重職守毋再輕率從事致干咎戾嗣後滇黔軍情卽由劉嶽昭專摺奏報仍隨時與崇實駱秉章籌商妥辦以期周密將此由六百里各諭令知之○軍機大

臣會同兵部等部覈議欽差大臣官文等會奏長江水師事宜一新設長江提督應駐太平府以資控制毋庸議駐蕪湖一建提督行署於岳州與太平衙署各以半年分駐以便周歷巡查一長江提督有交涉外國事件定爲文武兼用之缺仍歸江楚兩總督節制遇有緊要事件准其單銜具奏一提督之下設岳州漢陽湖口瓜洲四總兵並隸以狼山鎮總兵共六標二十四營一江面正流上起洞庭湖經鄱陽湖下至狼山鎮均歸長江提督統轄餘仍舊制一副將參將遊擊爲營官擬沿江分汛建立衙署一都司以下爲哨官卽住哨船辦公不准建衙一每營皆以都司二員管駕長龍船爲左右領哨分派守備管駕三板船爲副領哨一各營皆設督陣大三板一號長龍二號副將營三板四十號參將營遊擊營各遞減十號一領哨都司另給無兵三板一號以期打仗便捷一

自提督以下均酌設臺書書識辦理文案一兵丁俸給口糧按李在江甯武昌兩鹽道庫支領一凡副將營設都守千把外委四十三缺參將營三十三缺遊擊營二十三缺一提督准給坐船四號總兵三號副參遊各二號都司以下至外委各一號一千把外委員缺由提督遴員題補都守員缺由提督主臺會同總督辦理副參遊均作爲題缺至總兵缺出則以該提督並江楚兩總督所保堪勝人員候旨簡放一酌留江楚釐卡數處由各鹽道經收爲長江水師俸餉船廠之費一於安慶武昌長沙三省城設局製造子藥一於漢陽吳城草鞵夾三處各設船廠排定各營哨輪年修理一雨篷旗幟等項酌籌經費按年交哨官承領修換一廉俸兵米均照陸營支給一申明登岸吸洋煙賭博三禁違者分別參辦一水師責成以驅逐遊匪嚴防劫盜爲重遇有失事卽行開參一歸

隸長江人員有原保官階較大未經補實者准以小缺借補一戰船不准擅離汛地私借者照例議處一長龍長四丈有奇安礮六位三板長二丈九尺安礮四位一狼山江面較寬風濤不測應另造大船輪船以資巡緝一禁止商民私設礮船卽於戰船內奏派巡緝私鹽其未經奏派者概不准干預鹽務一建立衙署軍裝局卽於酌畱釐卡內動款支用一京口狼山湖口漢陽岳州五處水師標營悉歸長江提督節制其向無水師名目者仍照舊章辦理一水師技藝首重駕船次演礮哨官則兼閱槍箭每年春季提督在上江會同兩湖總督簡閱一次秋季在下江會同兩江總督簡閱一次覈其優劣分別保獎參辦以上三十條均應如所奏辦理未盡事宜仍令該督等妥議具奏從之○兵部議奏塔爾巴哈台城失守領隊大臣圖庫爾應得處分得旨圖庫爾著卽革職仍畱

領隊大臣之任責令戴罪圖功以觀後效○壬寅諭軍機大臣等
富明阿奏搜剿山內餘匪並收繳私藏軍器各摺片吉林山場餘
匪經烏里布等帶兵在輝發河一帶搜剿先後斃匪一百餘名燒
毀賊巢二十餘處西南一帶漸次肅清惟南北山內地方遼闊難
保無奸匪潛藏富明阿仍當飭令高福烏里布等分投搜捕務絕
根株以期一勞永逸至山內墾地游民及乞金流民人數甚多若
遽絕其生計恐致流而爲匪富明阿旣擬先收器械勒限遣散卽
當另籌安插之所俾得各安生業固不可畏難苟安致貽後患亦
不可冒昧從事激成事端總宜統籌全局謀定後動期於悉臻安
善另片奏擬收繳民間私藏軍器等件所見亦是著照所議辦理
惟不得任令差役藉端滋擾累及閭閻奉界香鑪碗子等處見在
有無賊匪伏匿並著都興阿嚴飭官軍會合吉林之兵實力搜緝

毋任竄逸將此各諭令知之○駐藏大臣景紋奏委員先赴隘口
勸諭披楞與布魯克巴罷兵息爭均知悔悟得旨披楞布魯克巴
既有息爭之意景紋自當於行抵隘口後相機妥辦以靖邊徼○
癸卯諭李鶴年整飭河南吏治○甲辰諭軍機大臣等瑞麟蔣益
澧奏廣東靈山縣西鄉剿撫平定見會西軍協攻山澤一摺廣西
匪首孫義大以山澤爲老巢分擾及廣東靈山之西鄉勢甚滋蔓
自上年以來經知府戴肇辰知縣王振榮馮詢等百計進攻地方
紳富毀家濟餉卒將二百餘里邨莊一時反正歸團首要各匪次
第殲擒尙屬奮勉急公所有在事出力官紳准由瑞麟蔣益澧擇
尤保奏毋許冒濫其業經反正之各邨莊著瑞麟等飭令該地方
官妥爲鈴束毋令反覆滋事見在山澤老巢經張凱嵩督軍合圍
勢已窮蹙卽著該撫嚴飭楚粵各軍實力進攻殲渠

又並著瑞

麟蔣益澧卽飭靈山官軍乘勝會合西軍越境協攻期於必克以清邊圉將此由五百里各諭令知之○乙巳曾國藩奏牛洛紅一敗被我軍擊敗後不能與張總愚合併周盛波督軍跟追五月十五日至永城之同和集探知牛逆欲竄過渦河遂催督各營窮追十七日該逆已竄過渦河周盛波趕搭浮橋渡河派周盛傳由西路進劉啟福等由東路進周壽昌由中路進而令陳明昇等各帶馬隊從旁衝截牛逆勢已窮蹙疾驅悍賊數千人賊中所謂內五營者盡擁回拒我軍分路猛擊賊眾冒死抵敵周盛傳坐馬被賊矛刺倒徒步交戰兵勇皆死關賊始大敗正追逐間有步賊一股逃入路旁廢圩周壽昌率師入圩接殺淨盡餘賊向南飛奔我軍追殺二十餘里牛逆踉蹌逸去周盛波晝夜追逐十八日至亳州十九日至鹿邑西南之馬家寨該逆已竄入陳州境內我軍馳逐

四百餘里人馬俱困將士多病卽在馬家寨休息任柱賴汶洗一股自五月初四日由宿州西竄盤踞鳳臺縣屬之平河山一帶與皖軍張得勝等相持日久二十三日王永勝一軍趕至懷遠二十五日劉秉璋一軍趕至蒙城周盛波亦自馬家寨回援二十六日至潁州府東之棗莊集賊聞援師四集遂自平河山西竄欲由潁郡之畱陵江偷渡沙河竄擾光固適遇周盛波軍突至遂折向東北竄逸繞至烏江河上游圖襲我軍後路周盛波揮軍齊進洋槍炸礮連環轟擊逆勢不支向西狂奔解散脅從難民千餘人二十九日賊竄至太和六月初一日竄至港溝劉秉璋與皖軍英翰等次第跟追張總愚一股自五月中旬由虞城西竄潘鼎新與劉松山張詩日之軍追剿二十一日同抵甯陵知該逆已至睢州之河陽集次日追至睢州該逆撲陳州城下旋即退去二十二日竄近

周家口之北寨牛逆亦由苑寨偷渡河南與張逆分而復合駐防周家口之總兵張樹珊派副將閃鳳來馬隊迎擊殺賊數十名是夕復分隊雕剿該逆不敢迎戰連夜由逍遙集一帶渡過沙河張逆自鄆城西遁牛逆自商水西遁均奔遂平確山一路訊據生擒賊供均稱該逆欲由信陽竄往光固六安等情臣查擒逆各股回竄豫皖兩省中原平曠之地四通八達若不擇地設防此勦彼竄終不能大加懲創上年劉銘傳帶兵入豫察看地勢卽勘扼守沙河之議驅賊於沙河以南以蹙其勢臣以彼時兵力未齊未遽允行今張牛等逆旣渡沙河以南任賴等逆亦將渡沙渡淮并趨南路本年防守運河竊有成效應卽倣照辦理惟自沙河上流直至郝縣汝州地段太長幾無止境臣博詢眾議擬自周家口以下至槐店止扼守沙河自周家口以上至朱仙鎮止扼守賈魯河由臣

派兵設防自朱仙鎮以北四十里至汴梁省城又北三十里至黃河南岸無河可扼空濠守之由李鶴年派兵設防自槐店以下至正陽關仍守沙河由喬松年派兵設防自正陽關以下卽係淮河由臣派水師與皖軍會防各分汛地層層布置或者漸逼漸緊遂捻於西南山多田多之處官軍較易爲力見已檄劉銘傳自徐州拔赴沙河口與潘鼎新張樹珊等熟商防守之策並咨商安徽河南兩撫臣調兵分防皆憑人力以堅守不以地險爲可恃至羣賊南竄不出南汝光固黃州六安等處則鮑超所統之霆軍劉秉璋楊鼎勳王永勝所統之淮軍劉松山張詩日所統之湘軍分路游擊亦尙足敷剿辦臣擬於十五日拔營東下閱看宿遷桃源一帶隄牆卽由運入淮汴流而上徑赴周家口沿途察看賊情地勢續行奏報又奏臣於四月初擬挑濬賈魯河置船設防專函商諸河

河督張之萬旋准覆稱賈魯河沙淤已久萬難興挑詢之河南

紳士言亦相同沙河上下千餘里地段太長防此兩河本係極難

之事惟念處馬隊不敵賊騎戰事亦無把握不能不兼籌防守

防河之舉辦成則有大利不成亦無大害是以仍就前議竭力興

辦劉銘傳首畫此策卽令其與潘鼎新張樹珊會防力任其難扼

守朱仙鎮以下四百里其自朱仙鎮以上必須專資河南兵力撫

臣李鶴年見已移紮許州豫兵已赴西路追剿趕辦河防咨商

李鶴年請其暫駐省城調回各軍先圖近守不必遠剿查自朱仙

鎮以北至河南省城四十里又自省城以北至黃河南岸三十里

以豫省各軍全力守此七十里似乎頓兵不進難免外閒浮議然

此七十里者全係沙地不易挖濠深慮旋開旋壅地雖少防禦

甚難但使扼防得力將來可與追剿之兵一同論功請獎本年三

月山東兩次設防先在曹州均經失利後在運河均稱得力河南兵不甚多即可倣照山東辦理不貪馳勦虛名或收制賊實效臣於軍事辦未就緒者向不輕於具奏因臣主聚兵防河之說恐使李鶴年蒙頓兵不進之譏不得不豫先奏明可否請旨飭李鶴年暫駐汴梁調齊各兵先辦朱仙鎮以北防務設兩河防務不能辦成或有損於大局臣願獨當其咎上諭軍機大臣等周盛波等軍勦賊獲勝疊經喬松年李鶴年奏報情形大略相同任賴等逆由鳳臺懷遠竄擾太和等處各軍追勦見有渡沙河淮河並趨南路之意曾國藩以捻逆回竄若不擇地設防恐此勦彼竄終不能大加懲創因採上年劉銘傳扼守沙河之議自周家口以下至槐店止扼守沙河自周家口以下至朱仙鎮止扼守賈魯河由曾國藩派兵設防自朱仙鎮以北四十里至汴梁省城又北三十里至

黃河南岸無河可扼空濠守之由李鶴年派兵設防自槐店以下至正陽關仍守沙河由喬松年派兵設防自正陽關以下卽係淮河由曾國藩派水師與皖軍會防各分汛地層層布置漸偏漸緊逐捻於西南山多田多之處官軍較易爲力所陳不爲無見曾國藩已檄劉銘傳自徐州赴沙河口與潘鼎新熟商辦法卽著責令該提督等認真防守不得空言塞責並著喬松年李鶴年調派得力之軍各防汛地以專責成李鶴年卽行折回汴梁駐紮調齊各兵先辦朱仙鎮以北防務自此次分段設防以後如捻蹤仍由沙河淮河回竄卽惟該督撫等是問賊騎雖多不得出南汝光固黃州六安等處有鮑超劉秉璋楊鼎勳王永勝劉松山張詩日等數枝遊擊之師足敷雕剿曾國藩見已拔營東下閱看桃源宿遷一帶隄牆由運入淮汴流而上徑赴周家口卽著調度各軍一面赴

防一面迎剿毋任推諉觀望以期迅速奏功鮑超一軍疊經諭令
官文曾國荃催令該提督相機進剿見在曾國藩既建設防限賊
之議賊不得出此數百里勢必竭力死戰鮑超見在行抵何處本
日據曾國藩奏該提督派員出口買馬二千匹請照例免稅鮑超
若俟馬隊練成方議進剿必致貽誤事機著官文曾國藩嚴飭該
提督奮勉圖功毋得藉口馬隊未齊遷延時日自取咎戾前諭曾
國荃將見紫應山之師爲鮑超後路聲援著卽酌量妥調其新募
訓練之勇已否成軍並著趕緊催辦駐紮要隘地方以防匪蹤竄
入鄂省腹地毋稍疏忽將此由六百里各諭令知之○命穆圖善
飭協領富勒琿赴德勒克多爾濟軍營襄辦歸綏防務○丙午諭
內閣前因左宗棠奏請將安徽補用副將馬復震酌改文職當經
諭令吏部查案具奏茲據該部奏查明成案請旨遵行等語武職

人員以帶隊衝鋒爲重若改歸文職轉恐用違所長咸豐九年間
守備彭忠信等請改文職欽奉 硃諭著不准行並諭以後保舉
單內再有似此者卽駁令另獎欽此 聖訓煌煌尤宜遵守所有
副將馬復震請改文職之處著毋庸議嗣後各路統兵大臣及各
督撫等不得率行奏請○丁未論軍機大臣等前因回匪肆擾新
疆各城勢甚猖獗諭令德勒克多爾濟等揀調錫林郭勒等盟及
喀爾喀諸部落蒙古兵一千名歸庫克吉泰等調遣並令車林敦
多布會同德勒克多爾濟籌辦茲據德勒克多爾濟奏遵調蒙兵
及籌防西北兩路情形一摺伊克昭烏蘭察布兩盟蒙兵除調赴
花馬池等處防堵外見駐本旗遊牧者已屬寥寥且均未經戰陣
該將軍見飭帶兵之貝子札那格爾第等二人在於所帶蒙兵內
挑選精壯各一百五十名派曾經戰陣之圖薩拉克齊等管帶仍

駐防所聽候調遣卽著照所擬辦理並著先期知會廉至將軍臺行走道路豫行籌辦其未入軍臺以前沿途應需糧餉仍著咨照趙長齡轉飭歸綏道供應此外錫林郭勒及喀爾喀諸部落蒙古官兵有無可調並著廉至文盛阿爾塔什達明誼車林敦多布迅速揀派務須挑選精壯不可以老弱充數殺虎口西北兩路德勒克多爾濟見已豫籌磴口等處蒙兵移往防堵所屬尙屬周妥烏科兩城應如何嚴密布置分防之處並著明誼麟興車林敦多布廣鳳奎昌明瑤一體妥籌仍一面與德勒克多爾濟文盛阿爾塔什達等察度會商相機分布毋稍疏忽將此由六百里各諭令知之○廣江蘇金匱縣學額六名無錫五名婁縣一名湖北雲夢一名○明誼以病免調德勒克多爾濟爲烏里雅蘇台將軍福興爲綏遠城將軍以廉至署察哈爾都統○庚戌諭軍機大臣等劉蓉

奏官軍勦賊獲勝踏平老巢追逐出陝並譚玉龍一軍勦回情形
催調穆圖善等營各軍分路布置各摺片穆圖善奏派兵赴陝助
勦並撥兵赴援新疆一摺逆回盤踞隴州之故關一帶併力抗拒
經陝省官軍攻克故關分途追殺甚多其續由華亭竄至上關一
帶另股回匪亦經劉厚基會同譚玉龍擊敗將上下關賊巢攻毀
竄陝回匪悉數追逐出境所有出力員弁著劉蓉擇尤保奏陣亡
將士查明請卹此次逆匪既受大創劉蓉自當乘勝飭令蕭慶高
等軍將盤踞華亭尖骨山餘匪殄殲卽由清水一帶節節進剿以
清甘省東路靜甯回匪萬餘東竄張家川逆匪復勾結固原黨與
數萬圖竄陝境固原華亭等處續一股匪分竄鐵馬河等處隴州
兵力未厚備多力分穆圖善見派總兵李曙堂等管帶楚勇一千
五百名馳赴陝省吳旂鎮並派西蒙克西克馬隊赴陝助剿卽著

飭令星速啟程毋稍遲緩至甘省同竄陝境各匪半係當日脅從
竄甘之眾劉蓉自當分別良莠剿撫兼施不得概行截殺致令黨
與日固防剿益形棘手著楊岳斌劉蓉遵照前旨另籌安插之法
以期日久相安穆圖善亦當相機進駐鹽固一帶疏通甘省東路
與隴州各軍互爲聲援張在山一軍卽著楊岳斌飭令撥出三營
紮鄜州之河上原聯絡陝軍互相撈應譚玉龍率勇東渡疊經諭
令劉蓉查辦何以尙未覆奏此次該革員復率勇剿匪究竟該革
員有無謀變所部各營是否尙思潰散著劉蓉迅速查明斟酌情
形辦理穆圖善擬將在營之直隸官兵一千名飭回直隸劉長佑
派赴口外歸廬克吉泰帶赴新疆卽著照所擬辦理將此由六百
里各諭令知之○以京察屆期諭各衙門秉公去取○予甘肅陣
亡副將方得元參將余炳忠遊擊殷得高等祭葬世職○辛亥諭

軍機大臣等富明阿奏按獲山內首匪圍場漸就肅清並驅逐它
金流民各摺片吉林圍場山內經富明阿督兵按剿疊次擒斬多
名見復將總逆首徐亮腥生擒正法並各處按斬餘匪百餘名山
內漸次肅清該將軍見已將按山勇丁裁減官軍撤遣歸伍並著
畱數營官兵分紮圍邊各山口聯絡防堵所籌尙妥仍著隨時查
察不可稍形疏懈奉省圍場界內仍恐有吉林勦散餘匪竄入都
興阿當嚴飭防兵官軍隨時入山按捕毋得日久生懈至偷挖金
沙流民爲數太多富明阿見雖飭令繳送軍器勒限三箇月搬移
出山仍恐聚而不散又復潛徙奉省圍場山內著都興阿富明阿
遵奉前旨會商安插之法迅速具奏務令各安生業免至流而爲
匪致他日滋生事端將此由五百里各諭令知之○子廣西陣亡
副將李正植祭葬世職○壬子飭催各省迅解京餉○癸丑子浙

江殉難知縣宋肇昌等建祠○乙卯諭軍機大臣等楊岳斌奏回省日期並見籌情形一摺曹克忠督率所部十餘營於五月初四日馳赴蘭州該標兵安靜如常並無閉城抗拒情事其爲因事起釁並非有心謀逆已可概見楊岳斌見由安定回抵省城將亂兵查拏懲辦止應將爲首倡亂及著名積惡之犯擒獲正法其被脅附從諸人自應概免株累俾眾心各釋疑懼不可逞憤妄行肆戮致已定人心復行搖動省城被戕各官准由該督查明彙案請卹在城彈壓撫綏各員並出城擊賊之弁勇並准分別酌保毋許冒濫譚玉龍率勇東潰前據該督奏請飭劉蓉將譚玉龍擒獲追繳侵扣餉銀卽行正法昨據劉蓉奏稱該革員率勇在隴州與回匪接仗獲勝余炳忠力戰陣亡與該督所奏事屬兩歧究竟譚玉龍有無謀變情形抑或因身獲重咎爲立功贖罪之舉並著楊岳斌

確實查明迅速覆奏不准稍有回護河狄回匪時出滋擾阻隔糧道若不急加痛剿官軍困於分防必致坐受牽掣楊岳斌見咨雷正綰督飭各營專顧平慶等處騰出張在山十三營赴省會合各軍進剿狄道次及河州亦是先其所急之策卽著督飭張在山等迅速進兵疏通糧道以蘇兵民之困並將河狄踞匪次第掃蕩淨盡毋再遷延致誤委任曹克忠平日帶兵勇往所向有功於甘省諸將中最爲出色茲因疾請假就醫儻不允其所請不足以示體恤著賞假兩箇月發去人蔭四兩交該提督祇領卽在蘭州城內安心調理毋庸遠道就醫以省跋涉伊所部各營著照楊岳斌所請令王得勝等分統提督印務卽著鄧全忠暫行護理將此由六百里諭令知之○丙辰以孟秋時享 太廟 上前期親詣行禮

○廣廣東連平新會兩州縣學額各二名○是月蠲緩陝西咸甯

等三十二廳州縣被擾被旱額賦